

論

語

詳

解

論語詳解卷七

郝敬解

述而第七○前二篇多論人物此篇明聖人志行由賢達聖也

子曰述而不作信而好古竊比於我老彭

千聖一心萬古一理凡後聖所欲言者皆先聖所已言堯舜禹湯文武雖往而典籍在卽列聖心思在也以心契心信之真而祇覺古訓之可好更何容作老彭卽彭祖壽歷唐虞夏商親見堯舜禹湯列聖夫子生不及見先聖而好古信述神交心接與覲面者無

異故曰竊比於我老彭。自以聞知同於見知。信之至也。蓋不信則不好。雖旦暮成今古。篤信自篤好。雖曠世如生平。孟子見知聞知。意本此。

信者真實之心。與忠信之信不殊。好古卽好學。夫子嘗言有忠信。如丘者不如丘之好學。又云好信不好學。其蔽也賊。篤信又好學。所以述而不作也。

老彭卽莊子謂彭祖。上及有虞。下及五霸者也。史記紀云。禹臯陶至彭祖十人。堯時已舉用。未有分職。舜乃命之。宰我問五帝德云。堯舉舜。彭祖任之。王符潛夫論云。顓帝師於老彭。壽千餘歲。王弼云。老爲老聃。

彭爲彭祖蓋二人按史彭祖楚之先祝融之裔陸終之第三子姓錢漢名鏗堯封之彭城今徐州也歷虞夏至商壽七百六十七歲老聃臯陶之裔世爲理官因以理爲氏紂時逃難伊墟爲李氏有李乾者字元杲娶洪氏女感飛星而娠十有二年而生子名聃與儋同又名玄祿字伯陽生而皓首故謂老子耳漫無輪又名耳邑于楚之苦縣賴鄉賴萊通又號老萊子周孝桓莊王世爲柱下史簡靈世爲守藏吏孔子嘗學禮焉孔子沒十九年而儋西入秦適流沙諸國壽四百有四十歲從古歷年久聞見多無如此二人者

言言解
故夫子言信而好古比之非謂此二人述而不作也
古名賢多矣若獨此二人不作其餘皆作者邪彭祖
作否不可考老子道德五千言作何加焉朱子以禮
記曾子問老子數章爲述而不作楊中立謂五千言
以自然爲宗亦是不作或謂五千言爲容成子作老
子述之皆附會之說

班固幽通賦云若胤彭而偕老訴來哲而通伯此語
可爲竊比老彭之一徵此爲欲親見千百世下來學
夫子爲欲親見千百世上往聖

子曰默而識之學而不厭誨人不倦何有於我哉

默識猶心得卽一貫之道非多學之識也無聲無臭
於穆不已者天之默識也不覩不聞必慎其獨者聖
人之默識也學學此也惟此學不厭時習而悅何厭
之有誨人誨此也惟此誨不倦無行不與何倦之有
教學二者相成書曰教學半學處卽教教處卽學學
能默識卽道義之門天機活暢人已周流所謂仁智
合而內外顯微無間不在言語答問以爲誨不在有
叩必竭以爲不倦不言而述歸于默識而已矣大道
通物我故每以教學對舉不厭不倦嘗以自任此云
何有者惟其本于默識也聖言雖謙終無誑語

默識知行合也。口耳非真。真自忘言。纔落言詮。便隔牆壁。故默識爲真知。夫子無行不與。卽是默識。後儒將此意盡割與二氏道術。所以支離。或云夫子與回言終日。又何也。聖人言而忘言。顏子不違如愚。所以默識。夫子不能不終日言。所謂何有於我也。他日謂子貢。吾與女弗如。昭雪此意。

子曰。德之不脩。學之不講。聞義不能徙。不善不能改。是吾憂也。

德本固有。不脩則壞。脩。削治也。如仁義德也。有欲害人之心。爲穿窬之類。則病德。故必脩治之。而後德全。

道不可以講而得學則必待講而明講者師友討論
內辨于心也義無常主遷徙隨宜已未盡知聞卽當
徙旣聞矣知其爲義矣因仍不遷則嘉言善行竟成
辜負不善之事始于過誤苟且掩護則惡日叢四者
之失由輕趨重四者之功由重反輕無德則當學不
學則背義背義則惡去惡則向善向善則學學則德
進四者身心要務人若不憂此四者便是小人而無
忌憚非必四者全失而後憂也四者失則違禽獸不
遠矣四事非一日可竟之功乾乾惕若天行自強所
謂君子有終身之憂望道未見唯聖人爲能耳

子之燕居申申如也天天如也

申申暢遂也枯寂則不申申昏沈則不申申天天微
悅也嚴肅非天天發揚亦非天天徒申申似舒遂而
少含蓄又天天則陽氣氤氲乃所以申申也徒天天
則似苞孕而不條暢又申申則天機長裕乃所以天
天也此聖人本色太和元氣平居乃見佛氏云妙好
觀自在像蹈襲此意

子曰甚矣吾衰也久矣吾不復夢見周公

夫子少壯時有心興復周公之業故夢寐中嘗見之
年老無意故無是夢此自然實境也不夢周公則一

切緣影都不入夢中矣。夫子六十耳順，七十從心，與大虛同體，通乎晝夜之道，而無夢寐，皆覺。宇宙皆夢，所謂至人無夢，此也。昔湯武伊尹太公，皆以蓬蒿成功。夫子年七十有一，尚請討陳恒，豈以衰年忘世年？衰則思宜，信切所以不夢者，惟其情識渾忘而歎其不夢者，乃所以深思周公也。刪詩書，脩春秋，多尊崇周公之意，人臣如周公，功德巍巍，不驕不吝，作周孚先，而子孫不念厥祖。夫子目擊宗國式微，何嘗一日忘魯？三桓之徒，亦未嘗一日忘夫子。故夫子居魯之日少，居四方之日多，至老而後返，發此歎，見魯事之

終不可爲也

人身載魂魄而有夢覺猶天地含日月而有晝夜獨陰不闕獨陽不翕一陰一陽相倚而爲道離則形毀偏則疾作陽勝則狂陰勝則癡至人守一魂抱魄則晝夜通而夢覺齊晝則陽開向明而爲離夜則陰翕背暗而成坎陽光外射如戶牖四闢萬象森羅陰輝內鑒如澄潭浸月遠影沈山晝寤如春夏萬物迸出外實而內虛夜寐如秋冬萬物收斂外虛而內實皆陽施陰受混闢互根之理聖人所以齊夢覺也夫子夢周公與覺同境以證老莊非幻兆耳故曰寢不

鄭康成謂占夢書亡紛紛作者如夢中夢可哂也
周公旦文王第三子武王之弟成王之叔父食采于
周周岐陽地名詩云周原膺膺是也周公封于魯成
王命公長子伯禽歸魯留公輔王室是時天下初定
東方諸國挾紂子叛公東征黜殷滅五十國還建東
都制禮作樂天下大定皆公之力也

子曰志於道據於德依於仁游於藝

道者公共之路未有所屬德者得也洪範云予攸好
德五福之一爲我有者也仁則德之精熟渾忘內外
者也藝在外是道德仁之枝葉也道不可須臾離人

終身由之而不知。祇爲無志。志於道者。精神會聚。行必著。習必察也。由是擇善固執。有得於己。爲據德。由是操存涵養。德與心融。爲依仁。依仁則學成矣。過此以往。復何爲哉。誦詩讀書。弦歌釣弋。無非涵泳義理。調養心性。爲熟仁之助也。四者雖有淺深次第。功惟一貫。非竟此而後及彼也。游。浮衍也。與沈溺異。玩物喪志。曰溺。從容順適。曰游。學記曰。時教必有正業。退習必有居學。不學操縵。不能安弦。不學博依。不能安詩。不學雜服。不能安禮。不興其藝。不能樂學。正業者。道德仁之謂也。操縵三者。游藝之謂也。隨志。道據德。

依仁所在而游藝則藝莫非道德仁也聖學以游藝居後世儒先格致是以游藝爲入門也故善學者道德仁藝爲一以其志之謂道以其據之謂德以其依之謂仁以其游之謂藝不善學者未免分疏

藝有六禮樂射御書數是也鄭康成云吉凶軍賓嘉五禮也雲門大咸大韶大夏大濩大武六樂也白矢參連剡注襄尺井儀五射也鳴和鸞逐水曲過君表舞交衢逐禽左五御也象形會意轉注指事假借諧聲六書也方田粟米差分少廣商功均輸方程贏不足旁要九數也

子曰自行束脩以上吾未嘗無誨焉

脩脩治牲肉乾之以爲脯也。脯十曰束。禮檀弓云束脩之間不出境。古人初相見必以贄借物求通也。貴者贄玉帛羔鴈士雉庶人鶩。目束脩其薄者耳。尋常見無贄行束脩者新相見也。自行束脩之後則相與有生平矣。以上二字所包者衆言無人不誨也。雖父母亦有幾諫。君亦有納誨。何必師弟朋友凡在相知但有往來咸教使歸于善也。嘗猶曾也。朱註引禮聞來學不聞往教意甚迫狹。聖意主誨人人苟向學雖無束脩聖人亦無不誨。或云制行檢束脩飾與此束

修異儿言非可一端盡也

子曰不憤不啟不悱不發舉一隅不以三隅反則不復也

教人之法最忌說盡依我作解障彼悟門我以口耳施人亦以口耳受終鮮自得學記云時觀而弗語存其心也必俟學者天機自動迎機觸發則渙然氷釋矣憤者心欲通而不得正在憤懣時一啟便豁然悱者口欲言而不能正自然怨悱一決便滔滔若是者舉一隅自能通三隅君子之教乃可漸施舉提示也隅稜角也方物四隅舉一隅者我開其端以三隅反者

彼通其餘也。復猶再也。旣通此再舉彼也。若旣啟旣發一隅已露而其人無通達之見。卽是不憤不悱者耳。則不宜復舉。機緣不合。深譚底裏。學者之不達寔教者誣之也。二十篇中與諸賢語。孰非啟憤發。悱如舉回。賜孰愈。子貢祗較多寡。舉貧樂好禮。子貢但引證據。所以夫子第二云弗如。許其言詩而不再舉本事。卽此意也。學記云。教者呻其佔畢。多其訊言。數進而不顧其安。其施之也悖。其教之也拂。故隱其學而疾其師。苦其難而不知其益。雖終其業。其去之必速。凡之謂也。舜之命契曰。敷教在寬。輔翼自得。存乎誨。

者之能寬耳若稍有倦教之心則不能需矣

子食於有喪者之側未嘗飽也子於是日哭則不歌

聖人以萬物爲體視人哀痛愁苦若已之哀痛愁若
食亦不飽喜亦不歌此自性情之常惟聖人適得吾
常與子見齊衰師冕見皆尋常日用感遇周旋中禮
盛德之至顯微無二心境如一所謂無行不與者也
或疑聖人毋固何有餘哀夫陰陽舒慘以浸而遷悲
驩頓改哀樂失常非變化之理毋固不以此論聖人
固同無固是以毋固

子謂顏淵曰用之則行舍之則藏惟我與爾有是夫子

路曰子行三軍則誰與知子曰暴虎馮河死而無悔者
吾不與也必也臨事而懼好謀而成者也

用則行舍則藏二語圓妙理無不貫聖人心同大虛
流行坎止無可無不可顏子克己幾於無我故能與
聖同而用舍其大者平常事理微妙玄通無迹可求
大則旋乾轉坤一張而舉一卷而收小則隨事隨物
迎幾順應諺云提得起放得下霽則行雨則止邵雍
詩云天根月窟間來往卽此意也顏子箴瓢陋巷似
乎不行而孰知其用卽行夫子周流四方似乎不藏
而孰知其舍卽藏聖賢爲斯世斯民用行是本願而

不用以藏是不得已故先用行而後舍藏也子路三
軍之問甚羸率視用行舍藏爲脂韋無白刃可蹈之
氣每見夫子當厄顏子輩無濟云爾臨事懼好謀成
亦似指畏於匡顏淵後之類諷之小怯大勇與用行
舍藏正同好謀而成謂謀則必成無謀必敗不成非
謀也善謀者必懼易所以濟變惟其能憂患也臨事
懼反暴虎馮河好謀成反死而無悔死則無成不悔
則不謀能懼能謀由平日涵養學問之功非行三軍
時一旦能如此也我與爾誰與吾不與三與切應
周禮天子畿內六鄉鄉一師鄉二千五百家師二千

言言解
五百人家出一人詩所謂三單也五人爲伍五伍爲
兩五兩爲卒五卒爲旅五旅爲師師卽軍也居則爲
比閭族黨鄉皆民也出則爲伍兩卒旅師卽軍也天
子六軍大國三軍次國二軍小國一軍三軍七千五
百人六軍萬五千人

子曰富而可求也雖執鞭之士吾亦爲之如不可求從
吾所好

執鞭之士爲人僕也求富而甘爲人役猶孟子云齊
人乞墦之意此就求富者之情釋常人日夜營
營冒羞忍恥爲利而已夫造化所以有正爲不測

若其可測人誰不避貧而趨富氣運所以難回正爲
不齊若其可齊世惟宜有富而無貧大抵貧不可以
人力免富豈可以人謀得先儒云君子贏得做君子
小人枉費做了小人豈如寡慾無求清心養廉不憂
不辱自適其適雖不得富自得頗多不然所好于人
者未必得所自好者并失何益矣孔顏疏水簞瓢而
樂惟其可好在我孟子云窮不失義故士得已焉從
吾所好也然言富不及貴何也貴賤有常分人尚自
守熙熙攘攘無非爲利禮云財用足則百志成有國
有家者患貧同也故聖人往往以貧富論人

禮君將駕則僕執策立馬前鞭馬策也一名箠一名
撻古用革以撻罪人辟行人因以驅馬後世以竹代
革故鞭從革策從竹書云鞭作官刑周禮條狼氏執
鞭辟行此施于人者也傳云左執鞭弭又曰雖鞭之
長不及馬腹此施于馬者也

子之所慎齊戰疾

齊以交鬼神天地祖宗明威如在戰則兩軍千萬人
之命委于鋒鏑縱我無傷彼卽有損天地好生何分
彼我疾則己身之生死所係養生卽以養德也就三
事體勘真能慎者幾人聖人所以異于人正其無異

于人者也。慎齊仁孝誠敬享帝享親之本也。慎疾文尚德勝殘去殺之本也。慎疾脩身理性祈天永命之本也。三者當慎人皆知之。當慎而不慎者。天下皆是也。故曰。仁人不過乎物。與前章食于有喪者之側義同。讀論語正當于此等處理會。

禮曰。君子非有大事。非有恭敬也。則不齊。君子之齊也。專致其精明之德也。故散齊七日以定之。致齊三日以齊之。定之之謂齊。齊者精明之至也。然後可以交于神明也。○老子曰。兵者不祥之器。非君子之器。不得已而用之。恬澹爲上。吉事尚左。凶事尚右。偏將

軍居左上將軍居右言以喪禮處之殺人之衆以悲哀泣之戰勝以喪禮處之○調神論云四時陰陽者萬物之根本聖人春夏養陽秋冬養陰以從其根故與萬物沈浮于生長之門從則生逆則死從則治逆則亂是故聖人不治已病治未病不治已亂治未亂夫病已成而後藥之亂已成而後治之猶竭而穿井闢而鑄錐不已晚乎

子在齊聞韶三月不知肉味曰不圖爲樂之至於斯也韶舜樂不圖者怪歎之辭樂不經夫子考正雅頌尚不得所況舜樂歷世之遠乎昔季札聘魯觀舞韶而

歎魯本有韶或不備耳齊大夫陳氏虞舜之前王也
傳先代樂較詳然世遠非鳳儀歌舞之完音矣君非
舜工非夔不遇夫子雖聞猶常樂耳聖人神明舉其
器卽通其意因其畧遂究其詳以至忘食意味宛若
親遊虞庭見喜起之盛者事憂時發不圖之歎
不圖猶言不料言不料韶樂之至於此此指齊也魯
莊公二十二年陳人殺其太子御寇陳公子完及顓
孫皆太子子奔齊齊桓公使完爲卿辭以爲工正傳
五世至陳無宇是爲桓子陳氏始大八世而陳恒專
政遂弑簡公是時陳亦爲楚滅先代之樂祇歸齊矣

而史記謂魯昭公二十五年。夫子仕齊爲高昭子家臣。師摯適齊。夫子與之語樂。遂聞韶。按夫子反魯正樂。在哀公十一年。時師摯尚在魯。故曰師摯之始關雎之亂。洋洋乎盈耳哉。摯適齊。在夫子正樂後。史誤也。魯自有韶。夫子非至齊始聞。特以是時陳氏擅齊。夫子知其將有篡弑之禍。而陳宗國破滅。子孫流寓他邦。爲人亂賊。聖人傷盛德之無後。而歎興廢之靡常也。國家將亡。安得此盛世之音。於政治之理。聲音之道。殊不相似。故詫之云爾。解者謂不意樂之美。至於斯。則視舜反爲劣矣。聖言深永。宜詳味之。

冉有曰夫子爲去聲衛君乎子貢曰諾吾將問之入曰伯夷叔齊何人也曰古之賢人也曰怨乎曰求仁而得仁又何怨出曰夫子不爲也

爲猶與也衛君衛出公輒也諾者心方思而其應徐也怨悔也仁者孝弟之真心也聖賢論人必原其心人心卽天理心安理順卽仁世俗論人格套形迹之間耳蒯賁得罪于父輒適孫當立禮也法也是格套形迹上事如伯夷叔齊兄弟相讓一尊父命一守天倫亦是格套形迹上事而夷齊心上各自有一種禮法不能拘者各求心安所謂仁也衛輒何曾有此心

假令全不爲利但守格套形迹亦不得爲仁況心本
爭利假適孫承祖子得罪父以爲口實耳仁者固如
是乎譬攘羊不隱是直之格套父子相隱乃爲仁殺
人執父是公之格套竊負而逃乃爲仁禮從心制法
由心設但得心安禮法在其中子貢發問之意全在
怨字上討分曉若夷齊之爲賢人非待于問也父子
與兄弟亦非可相比也所疑者祇恐二子當初偶然
激發爲此後來首陽餓死未免怨怨則心不真依然
是格套上事惟無怨然後見二子之心二子以兄弟
相讓其心如此衛輒子與父爭其心何安故知夫子

之于衛輒不爲也。凡忠臣孝子不辭艱難辛苦各求盡心耳。夷齊爲心上過不去所以終身餓死不悔舜爲心上過不去所以得天下不解憂衛輒苟有一點過不去之心何論當立不當立譬如季氏舞八佾只因心上忍故無所不至

衛國姬姓伯爵武王代商封其同母少弟于康是爲康叔武王崩成王討三監誅武庚盡有殷故地以其半封微子爲宋奉殷祀以其半益封康叔爲衛升牧伯國于殷墟朝歌之地卽今河南衛輝府淇縣等處是也

衛靈公夫人南子生蒯聵及公子郢而私通于大夫
宋朝齊豹之亂宋朝出奔宋南子召之太子適齊遇
宋野人歌曰既定爾婁猪盍歸我艾豕太子恥之與
其徒戲陽邀謀朝其母將殺之事洩太子奔宋靈公
欲立子郢子郢辭公卒夫人又欲立之郢曰亡人之
子輒在於是衛人立蒯聵之子輒晉趙鞅以兵納蒯
聵入于戚輒以兵拒之居數年蒯聵用其姊計逼大
夫孔悝納之是爲莊公輒出亡是爲出公子貢之問
正輒父子相拒時也諸侯多助輒者國人謂輒當立
故冉有疑之

子曰飯反蔬食謂飲水曲肱國平而枕之樂亦在其中矣不義而富且貴於我如浮雲

飯食之也。蔬食麤飯也。肱手臂也。不義而富貴謂處富貴而驕奢與不以其道得之者也。順逆兩境鍛鍊士子之鎚爐。凡虛見空解可閒時粧演順逆當前殊覺茫然。所以聖人勘人每于貧賤富貴之交樂者人心天機恒人爲情境牽累不得洒然。聖人物累淨盡元氣周流在富貴有天下而不與處貧賤樂亦在其中。蓋境由外來增添樂本性天固有天定則境忘必。據貧賤時言者富貴快豫則真樂不分貧賤憂戚真

樂乃見非聖人偏以貧賤爲樂也。貧賤究竟亦是浮雲。但富則可救疏水。況又且貴乎。況又值貧賤之時乎。豐約相形。人情于此不動心尤難。浮雲生滅無根。聚散倏忽。不義富貴亦猶此。義則爲名器。易曰。崇高莫大乎富貴。孔子見二帝三王之富貴。亦自起敬。若衛之父子。魯之君臣。此等富貴。唯恐加乎其身。況肯縈諸其念。曲肱而枕。有隱几旁觀之意。記者所以記諸衛君之後也。

詩云。彼疏斯稗。疏糲賴米。疏食。脫粟之飯。粟一斛春米六斗。曰糲。糲一斛春九斗。曰稗。八斗曰鑿。七斗曰

侍御○周禮六飲一曰水緯書云水者天地之苞幕
天下至多者莫如水浮天載地冠五行之始居六府
之先在天爲雨露在地爲江河功濟天下沐浴羣生
通流萬物仁也揚清激濁蕩去滓穢義也柔而難犯
弱而能勝勇也道江疏河惡盈流謙智也道家取法
焉謂之上德餘詳第六篇

子曰加字我數年五十以學易可以無大過矣

此夫子五十以前語故云加我數年古者五十服官
政聖學五十知天命易道五十則河圖之中大衍之
成數卦爻之尊位也凡人生半百閱歷已深前此未

定之見已徹後此老耄之年未至故五十知天易之中數也夫子因年發歎非至五十始學易也

河圖洛書呈天地之數皆中于五而成于十易曰天數五地數五五位相得而各有合天地之數五十有五天一地二天三地四天五地六天七地八天九地十故大衍五十易之全數也五十者五其十十其五也十五者三五也三參也五伍也參伍以變錯綜其數聖人所以示變者二也也大衍之數五十其用四十有九虛一者一貫也無可無不可卽五十也從心所欲不踰矩卽五十也無意必固我卽五十也不能

五十不可學易故曰五十以學易猶言以五十學易也

四方中央合成五五爲皇極五又生五六七八九合而成十五爲中體十爲中用執中用中如表之徵影
經言之答桴萬事萬物自然之節度故五者參天兩地之合十者兩其五所謂一陰一陽之道也數惟五與十相得如一五爲五二五爲十三五爲十五四五爲二十五五爲二十五六五爲三十七五爲三十五八五爲四十九五爲四十五十五爲五十由此以至百千萬億皆五十相得他數合則雜如一三爲三二二三

則六三三則九四三則十二生數與成數不合惟五十自相得是以爲中極而天地萬物不能違大衍以爲全數聖人則之以學易也

爻位唯五最盛乾坤爲諸卦父母乾之五坤之五極盡健順之道體易簡之德天地聖人之精蘊莫妙于乾坤之二五卽十也乾過五上爲亢坤過五上爲戰皆爲大過聖人學易全體乾坤故無大過贊易獨于乾坤加詳作文言以繼文王之志明天地之德也聖人學禮動容周旋無不是禮三禮所載制度儀文皆易徇也聖人學易動靜語默無不是易周易所載

卦爻象辭皆筌蹄也。無大過云者。乾文言所謂知進退存亡而不失其正。其唯聖人者也。聖人憂患作易。非爲小過而已。卦兌上巽下曰大過。大過者。往而不返。死喪凶咎之象。象曰。君子以獨立不懼。遯世無悶。如文王處商周之際。周公處不造之家。然後謂之無大過。夫子處春秋亂世。五十學易而後能脫然無累。說者以爲謙辭。非也。

昔伏羲俯仰三才。設象畫卦。以形造化之秘。作六十四卦。開物成務之理。具非獨爲卜筮設也。而消息盈虛。默定窮通之數。天地人物。未有能違者。列聖相承。

不能贊一辭。夏有連山。商有歸藏。其說不傳。使其無憾。文王必不更演文。王演易。取六十四卦。一正一倒。爲上下兩篇。每卦繫辭以斷一卦之理。蓋當商紂之虐。事凶淫之主。遭姜里之難。深有味乎義聖之作也。迨周公輔成王。值三監之禍。流言見疑。居東二年。作三百八十四爻辭。紹厥考之志。故曰文王我師。殆謂是耳。迭經二聖之手。隱奧畢達。易道大備。故世稱周易。夫子道窮于春秋。晚年讀易。三絕韋編。兼三聖作。爲十翼于彖卦。作大象于彖傳。于爻作小象。乾坤者。易之綱領。作乾坤二文言。融會大旨。作上下繫。

辭因文王次第作序卦廣義聖天地風雷山澤水火
之象作說卦又錯文王六十四卦之序作雜卦是謂
十翼反覆開明至矣盡矣夫三聖人者聰明府智達
天德而又身親艱難危險造化之理觀察愈精故其
言之津津然味末易道中天夫復何憾後世解易之
家如馬融鄭玄虞翻輩執象昧理流爲隱怪王輔嗣
程正叔直譚名理而象義頗疎然于易未有害也至
宋邵雍氏牽引術家小說作先天方圓等圖而朱仲
晦極其尊信謂爲義聖本義斥夫子十翼爲後天之
學謂易有伏羲之易有孔子之易有文王之易嗟夫

是何言與易豈有二先聖後聖其揆一也淺學之士承風好異簞鼓竽聽莫適所宗易學至今紛然淆亂矣解詳易

子所雅言詩書執禮皆雅言也

此承上章聖人學易而罕言易所雅言者惟詩書禮耳雅常也正也與俗反尋常論道曰雅言詩書所載皆切人情物理風俗古今治亂興亡之迹至于禮大小經曲三千三百莫不有品節度數士君子隨身規矩不可須臾離故曰執也詩書所言皆約于禮禮所履皆著于詩書詩書文也故詩書在誦說而禮在持

循皆夫子所雅言者也不及樂樂亦禮也故禮有記
樂無經樂記卽在禮記內儒者因謂樂經亡不應雅
言時樂先亡也或云詩卽是樂詩非專爲樂作也詩
爲樂作者惟頌耳或云何以不及春秋春秋爲禮壞
作執禮皆雅言則無禮者不言自警矣故易曰學書
曰讀詩曰誦禮曰執春秋曰知

雅言卽是中庸之教道不越中庸子思得聖祖之傳
作中庸而寓諸禮卽是雅言執禮也六經惟易精深
變化聖人不輕語以易道自不越詩書禮言詩書禮
卽是言易記者所以記此于學易之後易言多象象

隱而義顯聖人言義不言象所以爲雅言佛書偏言象故天堂地獄六道輪迴怪誕無稽聖人雅言忠信平實所以異于侏儻之教也

相傳孔子刪詩成以授子夏子夏爲序以授魯人曾申曾申授魏人李克李克授魯人孟仲子孟仲子授根牟子根牟子授趙人荀卿荀卿授魯國毛亨作詁訓傳以授趙國毛萇時人謂亨爲大毛公萇爲小毛公卽今毛詩也○初孔子刪書百篇遭秦滅學並亡濟南人伏勝能熟誦漢文帝時欲立尚書學以勝年九十餘不能行詔大常掌故晁錯就其家傳受之凡

二十八篇其後魯恭王壞孔子故宅于壁間得古
尚書多于伏生所授二十七篇武帝詔孔安國定其
書作傳共爲五十八篇未上至東晉始行說詳書解
○先儒謂周儀二禮皆周公作禮記爲孔子門人雜
撰至漢宣帝世東海后蒼善說禮於曲臺殿撰禮一
百八十篇號曰后氏曲臺記傳梁國戴德及德子聖
德剛后氏記爲八十五篇名大戴禮聖又刪大戴禮
爲四十六篇名小戴禮其後諸儒又加月令明堂位
樂記三篇凡四十九篇卽今之禮記詩書詳第二篇
樂攝公問孔子於子路子路不對子曰女汝奚不曰其

爲人也發憤忘食樂以忘憂不知老之將至云爾

葉公問孔子問其爲何如人也子路不對以聖德難言又未測葉公發問之意是未免有所安排回護夫子直自道其生平素位易簡何意乎人知何防乎人不知卽中庸至德神化妙境要不越好學耳語意渾然憤處卽樂忘食卽忘憂憤忘食樂忘憂卽忘老凡人學不發憤祇爲不樂人心不兢業自不幾康不鼓舞自不暢快孳孳汲汲惟日不足自不知老非兩時兩心如朱註已得未得之謂也或云聖人何用發憤聖人自言所以爲人者正自不異乎人人世不過憂

樂兩境人心不過憂樂兩情在衆人爲形骸之私
在聖人卽天理之生幾恒人天機淺則觸發不深聖
心靜深宥密元從貞起雷自地出萬物怒生幾不容
已卽是樂卦象以雷出地中爲豫豫樂也憤到忘食
自有一種眞樂樂到忘憂自帶一種眞憂忘憂之憂
外境也貧賤憂違可忘也眞憂卽憤憤與樂雖七十
從心猶有之故不知老將至如天道之有陰陽無陰
陽則無造化無憤樂則無生機誦詩讀書專心討究
是憤忘食精神不厭倦是樂忘憂終日終夜是不知
老將至憤所在卽樂所在卽死而後已所在也語云

樂此不爲疲聖學雖不主誦讀亦不廢誦讀夫子若不誦讀六經何由刪訂魯哀公十四年七十有一春秋乃絕筆然則誦讀莫如夫子也平生窮居故老于好學好學一事說向人不得人亦知不得特舉以自明其言愈近其旨愈遠與告子貢莫我知也夫意象正合老至不知卽知我其天境界彼言不怨尤此言憤樂惟其憤樂所以不怨尤聖人尋常自道天趣洋溢性命流形讀者味之

葉楚縣名楚稱王故縣尹皆稱公葉本姬姓之國楚滅以爲縣今河南南陽府鄧州北葉縣古應子國也

葉公姓沈名諸梁字子高楚莊王之玄孫沈尹戌之子爲葉縣尹楚昭王卒惠王立子西爲令尹召故太子建之子勝于吳子高諫不聽後勝作亂殺子西子期劫惠王囚之高府自立爲王子高自葉奔難攻勝走繚死乃使子西之子寧爲令尹子期之子寬爲司馬退而老于葉有存國之功而不享其利可謂賢矣昔夫子去衛盤桓于陳蔡間六七年陳蔡之君無足與者其意常在楚也是時楚國無事昭王欲用孔子葉公不能舉使聖人之效不見于當時故世稱葉公好龍屋壁皆畫龍天龍下之懼而還走喪其魂魄譏

其好士不識孔子也

子曰我非生而知之者好古敏以求之者也

聖人無誑語自古未有生而無不知者論良知赤子
皆然論多識必待于學嘉言善行備諸往古不求則
不得不好則求不敏衆人氣質昏愚義理主疎致清
神不淡聖人神明真見義理之無窮神交往哲自然
率學汲汲莫知其然而然所以爲生而知之也今人
不能好古敏求反以不學而知爲聖人豈不左乎越
是上智越好學越是下愚越懶惰所以諸賢好學不
如顏子顏子不如聖人

子不語怪力亂神

不語不與學者講說也。妖異曰怪。如鯀化黃熊。彭生
化豕。萇弘化碧。蛇鬪石語。樞作牛聲之類。氣勇曰力。
如桀紂握鈎伸鐵。撫梁易柱。手格熊羆。走及兕虎之
類。悖理曰亂。如寒泥竊室。子頑承。兒淫殊。弑父
與君之類。鬼靈曰神。如少皞之四叔。顓頊共工。烈山
之三子。五帝有名號。星辰有職司之類。怪則反常。力
則喪德。亂則害正。神則惑人。四者皆非中庸之教。天
地之間。何所不有。而人耳目見聞。寓諸庸。不及見。不
及聞。與不當見。不當聞者。何限。道不統于一。教不出

于中則諷詭譎張而無所底止故聖人立言垂訓必可與天下萬世共知共由四者不辨有無不爭是非但置之不語則其所語者亦可知知其所不語與其所罕言所雅言垂世規矩大道宗範居然可見矣蓋經正則庶民興庶民興斯無邪慝此孔氏家法六經典刑論語二十篇世道人心攸賴守此則治易此則亂學者所當服膺彼攻乎異端呶呶然是馬非馬聖人未遑也

按記者記此明夫子雅言詩書禮而不言春秋之意易詩書禮皆古訓聖人信而好古春秋爲憂世作所

書理之事皆怪也。爭戰之事皆力也。篡弑之事皆亂也。識兆卜著之事皆神也。故春秋不與易共學。不與詩書禮共雅言。非知我者。不與言春秋。

子曰。三人行。必有我師焉。擇其善者而從之。其不善者而改之。

此與見賢思齊章參看。人苟有志自脩。無處皆心之地。老子云。善人不善人之師。不善人善人之資。不貴其師。不愛其資。雖智大迷。竊與聖言相發明。同行有師。何往無師。不善亦師。何事非師。三人以我對善惡言。猶三思三月之三。不一之辭也。杜門索居。不見

人則已。但出門同人隨處得師。師在人而師師在心。心在卽學在道在而師亦在矣。或二人或多人或兼善惡或皆善皆惡。但能擇能從能改莫非我師。若終日羣居而無所取益。見君子不思齊與。小人狎不知省而乃負笈遠遊。不亦左乎。意稍重不善。邊知善爲師而不善不收。雖從善無由矣。不善且師所以爲必有師在我而已矣。我字甚活。三八各自有我。

子曰天生德於予。桓魋其如予何。

此章見聖人處變不憂之仁。不惑之智。不懼之勇。天生德於予。言有命自天。桓魋其如予何。言非人所能

爲也聖人素位而行無所動心其氣象安貞非援天
自解耳德人所同得惟聖與天合故動稱天凡不由
天生得者人力可奪由天生者堅強凝固威武不能
屈患難不能搖故曰無如予何恒情無事強直自任
見危則氣奪聖人平居則謙謙不勝臨難則自任不
辭畏于匡曰斯文在茲疾病曰丘禱久自信之篤如
此而又不辭微服之行所以爲知幾變屈利用安身
以崇德而爲無如予何者也易曰極數知來之謂占
通變之謂事陰陽不測之謂神苟唯其占而不事事
委于一定之數而無轉移之方則仲尼死于桓魋文

王終于姜里久矣何貴爲不測之神乎

聖言無誇言天以折人也言德以折力也言爲善必得福以明爲惡必凶也人皆天生天皆與以德願爲聖賢者溫良守理而爲亂賊者暴戾橫行若有力者伸有德者屈則君子祇供惡人之魚肉豈天意哉故聖人以天生德自信畏天脩德與逆天背德終不可同日語也若雖能害夫子是反天之道德不足脩矣古聖賢死于患難者不亦多乎天欲生之凶人欲死之斷乎其不勝也

桓魋卽向魋宋司馬向戌之曾孫出桓公族稱桓氏

初衛大叔疾出奔宋臣于向魋納美珠與之城鉏宋公求珠魋不與由是得罪謀弑宋公事敗遂叛時孔子過宋與弟子習禮于大樹下魋伐其樹弟子曰可以去矣孔子云云○初魋自爲石槨三年不成夫子慨然曰若是其靡也死不如速朽之爲愈冉子僕曰禮凶事不豫此何謂也子曰旣死而議諡諡定而卜葬旣葬而立廟皆臣子之事非所豫屬也況自爲之哉今彭城北六里桓山下有石室相傳爲桓魋石槨山臨泗水

子曰二三子以我爲隱乎吾無隱乎爾吾無行而不與

言言解 卷一
二三子者是丘也

謂道無隱乎上天之載無聲無臭夫子之言性與天道不可得而聞也謂有隱乎四時行百物生夫子之文章可得而聞也蓋無言默識者天下之至隱也聖人烏得而顯之二三子所謂有隱者此也然可知可能者天下之至顯也聖人烏得而藏之夫子所謂無行不與者此也道不離須臾夫子與二三子莫不飲食莫不由戶但聖人無意必固我與道爲體其次則如顏子終日不違所立卓爾是明見其所爲無隱者也二三子求之皮膚而不得其神情疑聖人有秘義

而不知日用橫來直去無非本命元神。夫子覩面呈
示。二三子當面錯過。行矣不著習矣不察。夫子將奈
之何。論分殊。爾爲爾我爲我。見諦不同。論理一。我卽
爾。爾卽我。同明交映。如一室千燈。我不能瞞爾。爾豈
得受我瞞。故曰無行不與。二三子是丘也者。相呼辨
認之辭。爲其覩面不識。故曰是丘。彷彿告瞽者某在
斯之意。聖言至此。肝膽吐露。然何不遂明示以所與
之物。其實無一物可以相示者。纔落形迹。都非實地。
故云。吾有知乎哉。無知也。昧者不悟。自粘連意。必固
我中。解脫不出。反疑聖人語之不詳耳。

二三子所謂隱者離顯求隱中庸云行怪之素隱也夫子所謂無隱者卽顯是隱所謂費而隱莫見乎隱也凡聖言溫藉言用卽是體言顯卽是微非如世儒單說效驗與禪機之幽僻理學之偏上忍耐不下一直說盡使學者將作譚柄全無體驗是教者之過也故論語二十篇爲實際

問如何是夫子行處曰未可作道德向聖人身上索解各就自家日用行處體勘卽處處與夫子相逢此理易簡上士聞言卽領不能者且循塗守轍久自升堂入室苟下學未能強求上達必有荒蕩遺漏之病

踏規矩繩墨爲世道人心累非小也。聖言有餘不盡
所以爲中庸之教。

聖人行處無跡。顏子雖從末由。故時時與夫子同行。
他人踐跡。故疑夫子有隱。顏子末由始信夫子無隱。
禪語云。直下便見。擬思卽差。又云。但盡凡心。別無聖
解。明蹈襲此旨。世儒遂割以奉佛。獨指鄉黨一篇爲
門人所得。無行不與之教。是釋氏所云泥裏洗土塊
者也。解者有詩云。日月光明滿大虛。瞽矇不見漫言
無。請君借問旁人看。可是吾曾隱爾乎。情境似得。

子以四教。文行忠信。

文謂詩書古訓學先誦詩讀書古今同也教雖有四
功惟一貫博文多識以求其理卽反躬實踐以見諸
行内存真實之心以立本卽本無僞之心以制事始
終相成內外交養以教中材則循序漸進路徑可入
以教上智則本末兼舉荒蕩無憂下學而上達未有
能違此者矣中人由文行入者多上智由忠信入者
多夫子之道忠恕而已忠恕卽忠信恕卽信也如其
心之謂恕不欺其心之謂信一也大學云藏身恕無
諸已而非人有諸已而求人信也中庸云忠恕違道
不遠庸德有諸已而求諸人亦信也顏子博文約禮

全體四教諸子或文而不行或文行而少忠信
未盡道也

四教不言知何也知爲明德乾體故三達德首知真
知卽是行虞舜所以爲大知也故曰民可使由不可
使知知德者鮮矣世儒以學文爲知知之影響耳
夫子誨子路以知之則忠信之本體主宰乎文行之
先者聖門無先知後行之教知行分自後儒始子云
文莫吾猶人也躬行君子吾未之有得故聖門不以
文學爲知全體四教始可言真知

子曰聖人吾不得而見之矣得見君子者斯可矣子曰

善人吾不得而見之矣。得見有恒者斯可矣。亡無而爲有。虛而爲盈。約而爲泰。難乎有恒矣。

至人曰。聖有德曰君子。忠信曰善人。不貳曰有恒。恒常也。常有之心。卽良心也。良心者。立人之基。聖人至誠無息。亦惟有恒之至。小人機械變詐。卽是無恒之至。亡爲有。虛爲盈。約爲泰。皆無恒之狀。人心常無常。虛常約。未有不恒者。無物之中。忽添一物。曰爲有大。虛之內。鼓以羶陽。曰爲盈。方寸之地。增以盛氣。曰爲泰。泰。後也。三爲變詐反覆。所謂作巫醫。不可況爲君子。聖人乎。聖人君子。善人品不同。而心無二。故曰六

人者不失其赤子之心。赤子之心卽恒也。易稱天地
聖人之道莫大乎恒。書云恒性。孟子云恒心無賢愚
貴賤大小達諸天下古今。卽性善之本體不受遷改
者。非善人外別有有恒一等也。恒則爲聖賢。不恒則
爲禽獸。幾希之間耳。衆人操舍無常。聖人純一不已。
惟君子能存此善人。不失此未爲善人。君子亦未嘗
無此。故不見聖人。望君子。不見君子。望善人。不見善
人。嗚呼危矣。然良心雖牴牾見之惻隱爾汝之羞惡
未嘗泯。猶是善友之端。培養擴充存乎人。故曰得見
有恒斯可矣。

言言言
君尊也。子美也。才德出衆尊美之稱。又曰。君國子民。謂之君子。善良也。吉也不犯物曰良。不失理曰吉。善人上。更加子曰二字。非一時語。而理本貫通。聯解亦得。善者。天命人性成繼之體。君子聖人之根。而恒與不恒在人。人皆有善。所謂十室必有之。忠信。孟子所謂善人信人也。苟不以一毫習氣攙雜。便是不可必得之中行。所謂不踐跡亦不入室。爲邦百年。可使勝殘去殺者也。天生聖人。君子之胚胎。不隨人脚跟。如顏子未竭才前。便是不踐跡之善人。卓爾後。便是入于室。故曰。不得而見之矣。

子釣而不綱弋亦不射宿

釣執絲垂餌求魚也綱繫網罟大繩舉網必提綱弋以絲繫矢仰射高鳥一曰矰矰高也鳥棲曰宿射則易獲漁不用網罟獵不射宿鳥則所獲不多昆蟲草木本吾一體草木無情方長猶不折魚鳥有血氣好生惡死于人尤近焚丘竭澤以恣其貪脯林肉圃以縱其殺仁者不爲也然而未免釣弋焉何也用以禮食以時天之道聖人撙節之故論仁及博濟曰堯舜猶病其罕言仁亦爲是耳嗟夫魚鳥猶不忍況于人乎佛氏蹈襲此意放生戒殺世儒斥爲異端此所謂

割吾聖道以奉佛者也。佛毀禮法，無人倫，棄君親，以身爲惡業，生爲苦海。乃至捨身飼獸，戒殺爲慈，譬之伐根而樹其枝，顛倒甚矣。聖人親親而仁民，仁民而愛物，親親則不能無祭祀宴享之禮，仁民則不能無養生送死之費。天道春生秋殺，聖人仁育義正，對時而養，搏節而用，故禮大夫無故不殺牛，士無故不殺犬豕，鄉飲燕射惟烹一狗，特牲少牢不過羊豕折而爲鼎，爲俎，神人徧及，不以口腹恣屠戮也。不綱而釣，不射宿而弋，仁至義盡，豈如梁武帝以麪爲犧，牡麋祭享，去人倫，無君子如浮屠氏竊聖人之意而實損

孟子聖人儒者顧割聖教予之曰吾聖人不死
不悖哉

子曰蓋有不知而作之者我無是也多聞擇其善者而
從之多見而識之知之次也

凡聖人之知卽是行言知卽行處證曰作曰從卽行
也創造曰作自古迄今蓋亦有不資聞見而創作者
若非性與天合如古開物前民之上聖卽是忍而自
用如今不著不察之下愚上智不可多得下愚當求
自免蓋道昭著于往籍散見于事物人有心忍耳目
聞見爲天靈之牖擇識爲反約之路聞見不厭多但

信耳多疑惟于中擇其善者依之目擊有據則並其
臧否記識之以所見徵所聞以所從參所識如此謫
求折衷雖不及作者之獨造而有所稽考持循庶不
墮愚者之冥行故曰知之次也此章之言本爲世人
不學妄作者而援古作者之聖以明生知之不多得
見學知之不可已也

互鄉 向難與言童子見門人惑子曰與其進也不與其
退也唯何甚人潔已以進與其潔也不保其往也

互鄉人名進退不分曰互鄉與向同童子夫子之將
命者是問之使見也門人夫子之門人如子路子夏

心洞然大虛不畱旣往不逆將來人苟向道而
進如草木欣欣向榮與雨露之氣相應天地無心也
使退而不善亦物自消歟天地亦無心也門人惑
者以其旣往爲不善退亦未必善故夫子謂吾但與
其進非與其退一何求人太甚乎彼旣潔已而進與
其潔耳何必追念已往之不善而過爲防乎朱子謂
此章錯簡未然

寰宇記徐州沛縣合鄉故城古互鄉一統志云互鄉
在河南陳州商水縣按沛縣春秋時爲宋地商水爲
陳地後人因夫子嘗在陳宋間附會之其實不善人

之稱如鄉原之類以其趨向無定進退回互得名若直躬接與荷蕢長沮桀溺闕黨達巷皆然如以爲鄉名豈萬二千五百家無一人可與言者與周禮鼃人取互物互合也蚌屬言固閉不開也與此互通

子曰仁遠乎哉我欲仁斯仁至矣

仁以天地萬物爲體量已大虛故曰遠先儒謂宇宙爲分門佛氏以虛空爲法身本此意子云仁者人也孟子云仁人心也心量大故仁體大仁在心心在我欲仁者將心還心將我心還我一念猛覺卽虛明無疑萬物一體更無等待無假借無虧欠捷徑易簡在

年鏘蔽須與猛醜則障晉銷全體呈現但爲如此容易却因如此錯過一覺而返者旋一迷而去保任護持亦存乎我而已

陳司敗問昭公知禮乎孔子曰知禮孔子退揖巫馬期而進之曰吾聞君子不黨君子亦黨乎君取酺於吳爲同姓謂之吳孟子君而知禮孰不知禮巫馬期以告子曰丘也幸苟有過人必知之

司敗自司寇陳人諱其太子禦寇名謂寇爲敗刑以敗寇也昭公魯君名稠襄公子年十九而有童心在位二十八年爲季孫意如所逐三十二年客死于晉

乾侯公素以習禮稱左傳公五年如晉自郊勞至贈
賄無失禮晉侯謂女叔齊曰魯侯不亦善于禮乎對
曰是儀也不可謂禮禮所以定其國行其政令無失
其民者也夫子因公善儀故于陳司敗問而以知禮
對蓋與鄰國大夫言而諱本國君之過所謂各於其
美也公娶同姓事折之魯周公後吳泰伯後
同姬姓也曲禮云娶妻不娶同姓以厚別也大傳云
繫之以姓而弗別綴之以食而弗殊雖百世昏姻不
通周道然也故合祀考妣祈禘必云以某妃配某氏
明非同姓也昭公時魯弱吳強公託昏于吳假助焉

既娶而稱其女爲孟子。長女曰孟宋。姓曰子。易吳女
爲宋。女掩同姓之失也。古男稱氏以辨族也。如三家
以桓公族稱三桓之類。女稱姓。生曰姓。以率祖也。如
周女姬姓。宋女子姓。齊女姜姓。楚女芊米姓之類。各
從其祖所自生也。私親曰黨。卽人之過也。各於其黨
之黨。夫子聞司敗言。旣不可以已言爲諱。君又不可
以娶同姓爲禮終不敢斥。君爲不知禮。乃自引爲過。
而推司敗爲知己。其是非曉然于言外矣。坊記云。善
則稱君。過則稱己。則民作忠。善則稱親。過則稱己。則
民作孝。臣子有至情。士類有公道。並行不悖。夫子對

司敗與答巫馬期可謂曲全矣。若葉公以證父爲直。司敗以黨君爲非。徒亟于自表而視君父如路人。是不仁也。故曰觀過知仁。聖人人倫之至者此也。其作春秋全體此義。春秋未嘗不諱而未嘗不直。不言而述無行不與而人以爲隱。通于此章之義。聖人之情可見。故曰斯民也。三代所以直道而行。聖人雖諱之。烏得而枉之一言之隱。而陳司敗卽指其過於立譚之頂。況春秋昭揭千古。豈辭罪我。使後世常有過孔氏如陳司敗也者。亦聖人之知己。聖人所深幸也。奈何。俗儒反爲聖人諱。使公論不明。欲立聖人于無過。

之地而實非聖人之本願矣。然則夫子求後世有罪我者不可得安望其有知我者哉。窮經所以難也。

巫馬姓字子期名施魯人或云陳人少孔子三十歲嘗與子路薪于韞丘之下陳之富人處師氏脂車百乘觴于韞丘之上子路語巫馬期曰使子無忘子之所知亦無進子之所能得此富終身無復見夫子子爲之乎巫馬期喟然仰天而歎投鎌于地曰吾聞諸夫子勇士不忘喪其元志士不忘在溝壑子不知子與試子與意者其志與子路心慙負薪先歸孔子曰由來何爲偕出而先返也子路以告孔子援琴而歌

鵠羽之首章曰子道不行邪使汝願者○子賤治單父彈鳴琴身不下堂而單父大治巫馬期以星出星入覩其勞而單父亦治巫馬期問故子賤曰我之謂任人子之謂任力

子與人歌而善必使反之而後和之

聲音之道由人心生也故聞樂可知德歌咏可養性舜命夔典樂教胄子惟詩言志歌永言四德中和皆于聲歌體究故子惟哭日不歌餘日皆歌也雖陳蔡絕糧弦歌不輟子夏援琴而歌曾參曳杖而歌古人歌爲常業興于詩以歌興也若徒玩其文字與他書

等何必詩乎。樂記云如抗如墜如槁木貫珠。古歌法也。古人作樂歌在堂上八音在堂下八音自外歌則元氣與元神訢合。所謂絲竹不如肉近自然也。從容一閱則形神交暢解慍銷累平躁釋慾大爲有功。先儒云學者悟古人命歌之志直歌到堯舜義皇之世。以此後世學術不明歌法不傳淫聲詭曲急節繁響。惟取娛耳何關性情。此不善之歌不足與也。子與人歌與其人同歌也。而指其人也善。謂和平中節也。反復也。使其人復歌待其畢然後夫子歌以和之。蓋善而必使反欲其人自聽于無聲之初而後和則彼我

天機浹洽。樂意流通。非徒入耳出口。實養心繕性之
一助也。有唱必和。歌者之常。而聖人能從容委蛇。太
和元氣。盎然于聲歌之外。世俗之歌。譁浪笑傲。神氣
散越。所謂人而不仁。如樂何。雖繞梁過雲。何關于性
情之理乎。

釋名云。歌。柯也。所歌之言。是其質。聲味有上下。如草
木有柯葉也。○樂記云。歌者。上如抗。下如墜。曲如折。
止如藁木。倨中矩。句中鉤。累累乎端如貫珠。

子曰。文。句莫吾猶人也。躬行君子。則吾未之有得。

聖教文行合一。學者逐末忘本。故聖人謙已以警人。

也。華言曰：文實德曰躬行，莫者，模擬之辭，猶人尚可及人也。未之有得，則全無之辭，文與斯文，博文之文異。此所謂采華忘實者也。子云：文勝質則史，史雖脩飾，按事傳述，尚有實蹟，但質不足耳。此則如後世辭卿墨客，亡是烏有之文，馳騁誇誕，稽之事則無據，質諸道則愈遠。所謂口才筆路，世稱繡虎雕龍，美其辭而命曰文。聖人謂之佞，謂之巧言。佛氏謂之綺語，夷考其人，素履佻薄，大節全虧，名教不齒。文與行分爲二途，故聖人于其文曰：莫吾猶人，輕之也。曰躬行君子，吾未有得，刺之也。聖人博文卽是約禮，文卽是行。

卽是忠信。六經之文。經緯天地。夫子之文章。卽性與天道。子臣弟友。庸言庸德。慥慥君子。文在茲。行亦在茲。根本盛而枝葉茂。何得與未得之分乎。

子曰。若聖與仁。則吾豈敢。抑爲之不厭。誨人不倦。則可謂云爾已矣。公西華曰。正唯弟子不能學也。

心之精神曰聖。心之生理曰仁。聖卽仁之至者。爲之爲仁。聖也。誨人以仁。聖教人也。道在天地間。雖極微妙廣大。惟是人心一竅。虛靈通透。許多當行之事耳。聖人清明在躬。志氣如神。從心順矩。天機運旋。自爲與爲人。從容中道。都無厭倦。學者從聞見擇執入真。

幾未徹障累未銷倚仗意氣學作如眼中有塵豈能
開闔無礙纔容操持旋已縱舍焉能不厭倦乎聖人
自無厭倦學者將不厭倦作式樣依倣是以難也
爲之與誨人不越人倫日用學而時習是爲之也無
行不與卽誨人也不思不勉天行不息是不厭倦也
苟非性與天合稍涉勉強卽是厭倦惟其學不厭乃
能誨不倦未有不善學而能善教者故曰人之患在
好爲人師溫故知新乃可爲師聖人稱顏子好學而
亦不言其誨人明德親民成已成物至于脩己安百
姓堯舜猶病公西華謂弟子不能學要其至何但弟

子不能耳。此仁聖卽然而識之。故前章云何有於我。除却仁聖。卑提不厭倦。故此章以自任。

子疾病。子路請禱。子曰有諸。子路對曰有之。誅星曰禱。禱於上下神祇。其子曰丘之禱久矣。

古人尚禱祀卜筮。至吾夫子不語神教。入務民義。敬鬼神而遠之。未能事人焉能事鬼。其贊易本諸天命。人性中庸之至。名教之宗也。疾病而禱。雖周公于武王亦然。子路之請。夫子不言其非。但問有諸。豈誠不知。蓋臣子禱祀爲迫切之情。而生死晝夜實自然之理。日之夕矣。禱豈能留天命。苟定鬼神豈能移理所。

必無也。子路更以有對。夫子亦不直斥其無。但云宜之禱久矣。禱久者。言已素行質諸鬼神。雖素行質諸鬼神。鬼神亦豈能使之不死。士君子脩行于昭昭。非微福于冥冥。苟不自信于平日。思免禍于臨事。則愚矣。子云。非其鬼而祭之。諂也。見義不爲。無勇也。子路好勇。見義必爲。而問事鬼神請禱。則其所謂聞斯行者。亦非務民之義者也。蓋鬼神爲大虛之靈。人心卽大虛。心體淨。則屈伸由我。鬼神豈能主。心體不淨。情識不除。境緣不徹。吉凶亦自我生。鬼神何預。故曰誠之不可揜如此。夫子路見未及此耳。

誅累也累死者生平實行猶今輓辭行狀之類卽其所以爲證者也爾不知何指子路引之以證昔人有禱者天曰神地曰祇人曰鬼或曰誅禱祀之書也士喪禮疾病禱五祀周禮大祝掌六祈六辭以事鬼神祇小祝掌侯禳禱祀之祝號以祈福祥而子路不及可知儀禮周禮多後人附會耳丘之禱久一語甚含蓄任而非誇自言平日兢業不敢獲罪于天地鬼神云爾朱註云無善可遷無過可改素行合于神明不似聖人語

子曰奢則不孫遜儉則固與其不孫也寧固

奢侈行也。儉美德也。不可以同日語。儉失止于固。奢失則不遜。聖言寬舒云不遜。卽是犯上作亂矣。固者。硜硜之稱執中之謂禮過則奢不及則固。小過不及。恒情有之。而此則習尚有心偏主者。有見于儉之爲陋。於是乎喜奢。奢本非欲爲不遜也。而窮奢之極。必至逼上。不逼上不足以盡奢。抑或有見于不遜之爲僭。反而求諸儉。儉豈不佳。然矯奢爲儉。必至裁省之過。迫狹而爲固。非固不足以矯奢。二者皆非也。但固之失。歉于禮內。而不遜之失。溢于禮外。固則禮猶在。而不遜則禮全亡。夫子嘗論本以儉與奢較。謂與其

奢寧儉人或未信今稽其敝以不遜與固較謂與其
不遜寧固人必辨之矣不然樽節退讓以明禮而乃
奢儉無度以敗禮乎信奢之不如儉也此與以約失
之者鮮林放問禮之本相發明晏平仲一狐裘三十
年不更祭其先人豚肩不掩豆固也管敬仲三歸具
官及圻樹塞不遜也故夫子謂平仲能以敬而謂管
氏不知禮論者優晏子于管仲以此至三桓舞八佾
歎雍徹奚足與言禮哉

子曰君子坦蕩蕩小人長戚戚

君子無欲而居湯侯命故廣大寬平大行不加窮居

不損是曰蕩蕩。小人多欲而微逐營求。患得患失。憂
愁不解。是曰戚戚。蕩蕩曰坦。無處不蕩蕩也。戚戚曰
長。無時不戚戚也。長戚謂多怨尤也。如欲不戚戚。將奈
何。曰坦則自無戚。凡戚生于行險。君子坦蕩而常存
小人長戚而實無忌憚。此乃所以蕩蕩而戚戚。
子溫而厲。威而不猛。恭而安。

每項非兩濟。正是溫與威與恭。恰好處。三項又非各
別。總是一團太和元氣周流。溫而厲則威矣。威又不
猛。威不猛則恭矣。恭又安。天機圓融。正在無忘無助。

之間首溫終安和氣包括裏許詩云溫溫恭人維德
之基堯舜亦惟溫恭中間厲與威變化無方溫中有
厲極難厲便猛不猛正爲厲在溫中都來只是一個
恭而安所謂允恭安安者也威厲包含在溫恭內是
以安安